



Communicaziun a las medias

Top Pop Rumantsch Nr. 4

Cuira, ils 15-12-2005 – Cun la gruppa „Siat“ è la quarta producziun en la seria dal Top Pop Rumantsch vegnida realisada. Il nov song “Sco glatsch” è d’udir a partir dad immediat exclusiv en il Radio Rumantsch.

Il nr. 4 „Sco glatsch“, in nov song da pop cun blers tuns da gitarra acustica e cun dus vuschs en il stil dals Everly Brothers, vegn ussa preschentà en il radio. Ils exponents da la band n’èn betg frars ma in bun team. Gioni Fry da Mustér e Pascal Sieber da Turitg cumponeschan e fan gia dapi quatter onns musica da pop rumantscha. Sin il disc cumpact dubel “Lain Fabular – ils Beatles per Rumantsch” è per l’emprima giada vegnida preschentada ina chanzun da Siat cun il titel „In di cun Tai“. La band lavura per il mument vi da la producziun da l’emprim album cun il num Siat. Il disc cumpara previsiblamain l’atun 2006.

Top Pop Rumantsch sa mussa sco bischu per il Radio Rumantsch (RR). Ina perla suenter l’altra da quest project pudain nus preschentar. Tut unicats. Sper las chanzuns da Susanna Sabbadini, ils Bulais, Simona Caminada e Siat vegn la retscha cuntinuada l’auter onn cun 6 novas producziuns e cun quai mess l’in u l’auter accent en il program da musica dal RR.

Sco glatsch

Musica e text: Gioni Fry, Arranschament: SIAT e Manfred Zazzi

Chant, gitarra acustica: Gioni Fry

Guitarre acustica ed electrica, chant: Pascal Sieber

Bass: Dany Hertach (Jestofunk, CeCe Rogers, Sophie Ellis-Bextor, Baschi, William White)

Battaria: Walter Keiser (Max Lässer, Andreas Vollenweider, Mario Pacchioli u.a.)

Ulteriuras infurmaziuns:

Jachen Prevost, manader musica RR, Tel. 081 255 75 75, jachen.prevost@rtr.ch

Gioni Fry (1970), da Mustér è chantadur e ghitarrist. Sco anteriur leader da la band da rock rumantscha Barock ed iniziand dal project musical „Lain Fabular – ils Beatles per Rumantsch“ è el activ dapi blers onns en la scena da musica rumantscha.

Pascal Sieber (1974), da Turitg, medemamain chantadur e ghitarrist . Sco musicist da lingua tudestga ha el s'inamurà en la lingua rumantscha e cumponì intgins tocs en quest linguatg.



Text da la chanzun:

SCO GLATSCH

Gl'ei sco glatsch
Che liua en mes mauns
Igl ei sco la cuntrada
Che fui sper mei vi
Sco la vapor d'ina fladada
Strusch cheu e gia naven

Strusch cheu e gia naven

Las neblas tilan sperasvi
Ils dis sebrattan cun las notgs
Ei dat nevas, dat sulegl
Jeu neschel e jeu mierel di per di
E ti vegnas e vas sco
Sch'jeu fuss' tiu da casa

Sco sch' jeu fuss tiu da casa

Tia preschientscha mazza mei
Jeu anflel buca ruaus
Igl ei sco larmas che brischan
Zenns che tuccan en miu tgau
Ed jeu audel nuot auter
Che tes pass en miu cor

Che tes pass en miu cor